

Aen Seizcin Langman Neix

这个浪漫的春天

Rumzbaek cihuhu haenx ninzndaek lo, nae hausagsag haenx ma ranz lo, doengh-yiengh ninzndaek haenx ndiu daeuj lo…… Dahsau seizcin langman haenx yamq din mbaeumbeng de, daeujdaengz aen daihdeih dwggyaez neix.

Yawj! Raemx dah “dingdung dingdung” ciengq dwk go, geijlai angqyangz, geijlai ndeidingq! Naj raemx dah fouz miz limqva hoengzmaeq, dwg byawz diuqbeiz ne? O, de dwg rumzcin unqswnh, dwg de ci loengq limqva dahnuengx vadauz caeuq limqva dahnuengx vayinghvah henz hamqdah. Vaiq yawj gyoengq dahnuengx, aen ndang gyaundeide, gemjnaj hoengzmaeq de, baenz geu baenz geu vahom de, dwg geijlai hawj vunz fiz hawj vunz maez ha. Ha, aen seizcin langman neix!

Gyoengq dahnuengx baenzneix gyaundeide, suenva baihlaeng de va hai ndaej hoenghhwd neix baenzlawz ndaej fug saw ne? Vameizgveiq ceng gonq lau laeng dawz duj va hoengznding hai youq dinggyaeuj, mwngz caenx gou mbat he, gou bungz mwngz mbat he, byawz hix mbouj nyiengh byawz; gyoengq vamauxdan hix gang hwnj gak saek gak yiengh liengj iq, miz saekmaeq, saekhenj, saekgyaemq, saekraiz nding hau…… gyaundeide dangqmaz; gyoengq vayilanz hix cungj ndonj okdaej, baenzneix maezvunz…… Ha, aen seizcin langman neix.




Mwhde, henz suenva cienz daeuj singriu lumj duz cinglingz riu nei, lumj diuz go ndeidingq nei. Sijsaeq yawj, laxlawz dwg gyoengq lwgnyez dwggyaez ndeu. Gyoengqde miz mbangj doxcaez cuengq yiuhrumz, miz mbangj youq diegnywj guhcaemz, miz mbangj youq henz suenva mup vahom…… Gyoengq lwgnyez cuengq yiuhrumz haenx, fwngz gaem sai yiuhrumz, youq gwnz diegnywj buet bae buet dauq; gyoengq lwgnyez guhcaemz haenx, miz mbangj guhcaemz “san swxva”, miz mbangj fwngz gaem fwngz gvaengz baenz gien, din dap youq gyang song fwngz cienq dwk diuq; miz mbangj guhcaemz “duzyiuh gaeb gaeqlwg”, boux vunz he ndwn youq baihnaj, gizyawz vunz ndwn youq baihlaeng, moix boux vunz fwngz dap youq gwnz mbaq boux baihnaj ndoj “duz yiu”; lij miz vunz guhcaemz doxndoj, boux vunz he ndwn youq cungqgyang geq ngeihcib aen soq, gizyawz vunz ganjip ra giz dieg ndeu daeuj ndoj…… Seizcin hawj gyoengq lwgnyez caenhcingz guhcaemz. Ha, aen seizcin langman neix.

“Momo——” gizgyae dwg gyoengq vaiz he cwxcaih gwn nywj. Aen geiqciet neix lienz duz vaiz cungj bienq ndaej vaiqvued lo. Doenghduz wnq hix caez ngonzyawj gingjsaek seizcin gyaundeide maezvunz neix.

Ha! Aen seizcin langman neix!

(Suhcouh Si Gauhsinh Gih Swhsanh Sizyenz Siujyoz Ciz Hihiyiz)



Aen Hongh Gyaundeide

美丽的院子

Raq fwncin he doek gvaq le, gou caj mbouj gib daeujdaengz aen hongh ranz gou.

Va, ndaw hoengheiq singjsien, duz “doengz” ndeu cingq gvenj youq aen hongh ranz gou. Neix dwg duz “doengz” geijlai gyaundeide ndeu ha! De lij ndik raemx coh laj ne!

Yi? Du “doengz” baenzlawz ndaej ndik raemx ne?

Laxlawz dwg dougungj aen hongh ranz gou, dougungj saekhenj de deng fwncin swiq ndaej henjrwgrwg. Gwnz dougungj raih rim gova, mbaw gova deng raemxfwn swiq gvaq le, heuyauyau, ndik raemxfwn gwnz mbaw hix manzgyaengj dwk buet bae buet dauq.

Fwn doek gvaq le, duj va couh engq gyaundeide lo, miz saekhoengz, miz saekmaeq, miz saekgyaemq, lij miz saeknding. Saeknding lumj daengngoenz nding’ yanyan, saekmaeq lumj aen naj dahsau maeqfwdfwd, saekgyaemq lumj majnauj ronghmyigmyig, saekhenjnding lumj fwjhaemh lwenqlamlam. Saekheu, saekhenj, saeknding, saekmaeq, saekgyaemq, saekhenjnding, ingj youq laj mbwn oatat, mbouj couh dwg duz “doengz” gyaundeide ndeu ha?

Aen hongh ranz gou caen gyaundeide!

(Vazdungh Swhfan Dayoz Suhcouhvanh Sizyen Siujyoz it nienzgaep Yiz Sienghiyiz)

Rumzcin Diuqbeiz

调皮的春风

Seizcin daeuj lo, dienheiq menhmenh raiej lo, cumx lo.

Gyanghaet, rog dou “buci buci” yiengj dwk, neix dwg byawz daeuj roq dou ne? Hwnqdaej hai dou, fofoto, yo, dwg rumzcin diuqbeiz daeuj lo. Laeq diuqbeiz neix cup aen naj gou, yaengyaeng bek fwngz gou, biengj gok buh gou, ci luenh byoemgyaeuj gou, byoem led aen hoz gou humzsisi.

Bae! Bae! Bae! Gaej cauz gou lo!

Hoeng de mbouj guenj gieneix, heux gvaq henz ndang gou, coemj hwnj gwnz daiz bae, fofoto biengj saw gou, youh ci mbin giij veh gou, mbatneix gou huj lo: Mwngz caiq daujluenh, gou mbouj leix mwngz lo! Siujsim gou gven mwngz youq ndaw ranz mbouj hawj mwngz okbae. Rumzcin diuqbeiz lumjdwg lau lo, baez

cienq ndang, ndonj ok dou bae, ngauz go makgaivaiz ndaw hongh, bued nga faex laehcei geq, youh ci gvaq doenghnaz, lij mbouj lumz vax aeu gaem nywj roz ndeu, it loh angqfwd ciengqgo. Fofoto! Seizcin daeuj lo, go’ nywj vaiq did ngaz, gomak vaiq hai va, vei! Daxgoeng daihdeih, mwngz vaiq ndiu lo.

Gizgyae, daxgoeng bya daenj buhfwj, hoemq denzmok, lij ninzndaek fufu, rumzcin raen le youh bongj hwnjbae, daxgoeng bya mwngz gaej gik lo, gou bang mwngz duet buh, vaiq di ndiu daeuj! Fofoto, fofoto, de bued denzmok, sik buhfwj, dawz ndit daiq daengz henz ndang bya hung, daiq daengz baihnaj diuz rij sawndik, daiq daengz ndaw doenghnaz gvangqlangh, daiq daengz aen mbanj hoenzfeiz hwnjngeungeu haenx.

Daxgoeng bya ndiu lo, dahnuengx rij riu lo, doenghnaz angq lo, aen mbanj gyaue lo, nywj iq ndonj aen gyauej okdaej, va’ ndokgengj loh’ ok najriu de, byalwg yat ok naj raemx, hoenzfeiz niuj aen ndang de, diuq hwnj foux angqyangz!

Ho! Rumzcin diuqbeiz; ho! Rumzcin angqyangz. Fofoto, fofoto, simsoh, gvai-gvet, rumzcin mbouj rox naetnaiq bae gyaep seizcin neix, daemj hai aen sim gou, hawj gou yawjraen ngoenzcog gyaundeide.

Gou siengj coux hwnjbae, rag fwngz mwngz riengz mwngz doxcaez bae heuh sojmiz doenghiyengh ndiu daeuj, coi va hai doh.

Ha! Rumzcin diuqbeiz, gou gyaep mwngz!

(Fuzgen Swngj Anhhieh Yen Daih Cib’ it Siujyoz Linz Yizfan)

